

Znacht im Wald

Ich weiss nöd öb das wahr isch oder öb ich das nur träum
Es isch zimmi chalt und s'hät überall Bäum

Es isch stockdunkel, me gseht fascht nüüt
Kei Ahnig was da alles am Bode liit
Jetzt hani öppis ghört raschle glaub
Wahrschinli nur de Wind im trochne Laub

Es schliicht öppis verbii, ich weiss nöd was oder wer
Es chönnt en Igel sii, es isch hoffentlich kän Bär

Uu s'isch würkli bitzli gfürchig, bitzli gfürchig znacht im Wald
Uu s'isch würkli gfürchig znacht im Wald

Du ghörsch öppis schnuufe, Momänt das kännsch
Das mues e Wildsau sii oder en Mänsch
Jetzt schtaht er da, s'isch leider wahr
E komischi Gschtalt mit lange Haar

Sie winkt der mit de Hand, zum dich no nöcher ane locke
Nei, ich bi's doch, bi fascht no meh veschrocke

Uu s'isch würkli bitzli gfürchig, bitzli gfürchig znacht im Wald
Uu s'isch würkli gfürchig znacht im Wald